

四庫全書

集部

欽定四庫全書

集部

三華集卷十五至
八

詳校官中書臣瞿照

助教臣常循覆勘

總校官進士臣朱鈔

校對官修撰臣吳錫齡

謄錄監生臣劉廷勳

欽定四庫全書

三華集卷十五

明 錢仲益 撰

錦樹集五

五言排律

賦得七星岩送曾侍讀使安南

岩在肇慶府
端溪出硯處

迢遞交州路風流翰府人
詔頒金殿曉香散玉堂春
疏爵綏遐壤掄才選近臣
慶逢千載會化決萬方民
捧冊

嚴將命乘槎遠問津周行馳驛騎法象動秋旻使節過
南海鄉心望北辰擬投岩下硯那受橐中珍文采昭雲
漢聲華動縉紳帽花珠孔雀衣飾錦麒麟重譯宣天語
諸蕃感帝仁龍杓回指日歸奏覲楓宸

送趙叅政同曾侍讀使安南

萬里傳宣客千年報國心尚方頒使節絕域致綸音過
海船頭望看山馬上吟流芳從趙槩同使得曾參抃舞
齊聽詔懷來即獻琛橐中無受贖幙下有埋金樽俎椰

漿席旌旗荔子林歸朝報天子重沐聖恩深

沐散騎素軒

昭代勲臣子高門世祿家自能敦質樸渾不尚豪夸鳳
鳥巢阿閣神駒產渥洼羔裘時退食鷺序曉趨衙粉署
頻頒秩瑤堦屢拜嘉容刀懸琕琫環珮響衝牙精白承
天意澄清閱歲華壺冰寒徹底圭玉瑩無瑕雅志緇難
涅凝神靜不譁趣高安澹泊欲寡厭紛拏旭日明虛室
涼颼透碧紗屏風雲母雀雀滴露水晶簋縹帙書連架銀

鞍騎擁馱開渠秋洗竹掃雪夜煎茶小沼魚吹浪間庭
鶴啄沙輕烟籠栢子皓月浸梅花獨得天然樂何煩采
色加錦衣還尚裝玉樹每依葭身被皇恩重心扶聖歷
遐永言行富貴忠孝是生涯

挽廖檢討

旅櫬棲官舍書燈照總帷故鄉千里道遺藁一囊詩得
句哦松徑橫經采藻池講筵新入侍翰府久相推薦重
朝賢刻名彰太史碑征帆吳樹杪歸旆楚江湄月皎猿

聲苦秋清鴈影遲誰憐同舍客南望不勝悲

送盧立魁赴無錫學訓導

送君司訓日是我憶家時古栢藏書舍高荷蓋泮池夢
猶懷舊迹交喜結新知月皎雞聲早江空鴈影遲鄉山
增秀色弟子得名師伐鼓晨光啓橫經晝景移行藏原
有命離別可無詩寄問寒梅樹花開到幾枝

送蔣照磨改除周府長史司典簿

楚楚儒林彥英英幙府賓青田巢瑞鶴赤縣得祥麟綠

水秋光淨紅蓮晚色新竹陰三徑曉花氣一簾春拄笏
哦詩快看書剪燭頻琴樽時適意案牘每勞神報政趨
青瑣朝天拜紫宸上功書選部遺愛頌居民王國崇藩
輔曹司擢從臣清才勤贊畫素志展經綸風送凌霄翮
波迎縱壑鱗丹心知轉壯白首念相親殘雪淮山外寒
烟汴水濱梅花開盛日須寄便郵人

梁先生畦樂軒

歸田依老圃結屋在東臯澹泊安蔬食辛勤作土膏繞

籬栽杞菊開徑刈蓬蒿日涉還成趣晨鋤豈憚勞紫瓜
初戴甲赤芥漸生毛齏醢凝香露茶鐺響夜清留賓長
剪韭對客或持螯書帙多於鄴詩篇雅擬陶野情甘抱
甕機事恥為樺夕照山當戶春溪水滿篙散行便短褐
却掃謝旌旄扶老憑輕策怡神付濁醪無營心皦皦自
得意囂囂端足禪風俗空令惜俊髦賢郎登秘省老我
幸同袍撫卷翻謠詠臨風獨仰高

何彥澤靜學齋

東方有佳士好學正華年篤意親編簡潛心對聖賢神
凝中自寂志一內斯專汲古垂修綆飡腴藝沃田窮經
勤索隱紀事必鈎玄閉戶時危坐挑燈夜未眠薰風初
永日微雨試涼天書曬花前帙琴彈竹下絃蔚文看隱
豹妙趣悟飛鳶每惜分陰過都忘百慮牽名言原有訓
雅道豈無傳聞說成名後天街已著鞭

廬南書屋為人賦

習隱傍廬嶽卜居依翠微嵐光淒竹素野色潤蘿衣瀑

布瀉寒綠香爐生夕霏二賢遺化在五老列峯圍樹繞
屋頭出雲從簷下飛春明花漫漫秋淨竹暉暉白鹿規
猶是青牛迹已非詩成僧和數門掩客來稀月下聽猿
嘯松間候鶴歸漱餅清讀易開甕助吟機茗淪林前火
琴調石上微自耽絃誦樂寧受利名羈趣逸何人識情
高與世違聖朝無棄士未卜老岩扉

謝縣丞永思軒

蘭桂欣方茂椿萱念早萎未酬烏鳥哺先感白雞悲痛

切終身慕恩深固極思羹牆常有見酒肉更無期飲器
香仍在書籤澤未衰露華淒宿草燈影耿空帷蒿里秋
陰薄松庭晝景遲好推純孝意為政恤孤墮

送黃太守復任毗陵

早歲擢巍科才華孰爾過含香參玉陛載筆侍金坡夕
拜趨青瑣宵吟望絳河一麾分郡寄五袴聽民歌孟簡
名猶在延陵迹未磨孝心江夏篤循政潁川多鬻舍森
蒼檜公庭長綠莎三年書最考重任沐恩波

為司訓賦澄心堂

典訓居清暑陶情託素琴神凝諧絕調志靜愜冲襟妙
悟昭文趣高超太古心盡令諸念息不遣一塵侵壇杏
含春意庭槐轉午陰每敷重席坐時據槁梧吟小篆烟
霏冷踈簾月影臨悠然皆自得何必待知音

送薛僉事朝正回廣西

司憲登烏府朝正覲紫宸陳辭當吉日陪祀及剛辰竣
事將旋駕乘槎欲問津多君能念舊顧我幸依仁班列

曾聯佩家居復接隣名因清節著情為故鄉親日月雙
飛鳥乾坤一老臣兩江連海徼八桂隔湘濱轉覺丹心
壯寧羞白髮新霜威邊郡肅風化峒氓馴按部憂民切
褰帷問俗頻冠莪金獬廡衣織錦麒麟驛樹遙迎棹沙
鷗不避人梅花殘送臘柳色暗嬌春去去才難盡匆匆
意未申臨岐空惜別千里望行塵

飲中八仙圖

天寶承平日長安舊酒徒至今千載下猶見八仙圖任

似船中載何嫌市上呼墨池追草聖羯鼓讓花奴玉樹
真堪愛金山卒受誣長齋真曠達五斗轉盧胡自得忘
憂趣那辭解帶沾因歌杜陵曲遺跡歎荒蕪

為林景雲賦琴室

王府殿下親書琴室二字并作詩以賜典樂林景雲
為賦詩二十韻

自昔庖羲氏于時始制琴不徒資簡澹實欲禁哇淫歷
歷先天意寥寥太古心龍唇移軫玉蛇腹點徽金誰識

高山志難諧彩鳳吟虞歌嗟既遠襄教悵應沈聖代崇
三禮祠官典八音宮僚登妙選仙館起華簪曲度升堂
迴聲和入室深試聆宣雅奏足使散煩襟濁似牛鳴益
清如鶴唳岑樂同兄弟翁誠格鬼神歆屢沐淵衷賞親
承寶翰臨榮光動奎壁珍貺重瓊琳雲漢銀章燦枝柯
碧樹森永涵恩浩浩端稱德惜惜豈但裝牙軸還宜藉
錦衾借觀填客屨傳誦藹儒林睿藻何由續焦桐不易
尋更當藏什襲留示子孫欽

寶賢堂賜燕謝恩三十韻

有序

臣以暮年嬰犬馬之疾屢蒙賜問茲以十二月初四日恭遇千秋令節臣先於初三日扶僮入見伏蒙賜燕於寶賢堂又蒙賜以睿書金花龍箋教命一紙曲加勉諭置臣於賢臣之列臣以駑鈍之資自揆弗稱彌增惶悚謹撰拙詩三十韻奉進以謝感戀恩私不勝激切之至詩曰

聖主崇文化賢王贊太平分封開大府夾輔衛神京日

近金枝茂春深玉葉榮築臺延衆彥闢館聚羣英設醴
緣尊道窮經儼力行積書敦古實樂善篤堅貞瑚璉先
登用琅玕悉見呈席珍爭待聘劍匣盡騰精脫穎歸囊
處連茹起彙征迷邦寧自悶韞櫝敢容振國士收韓信
天人得孔明擁門迎郭隗虛駕揖侯嬴入座聯圭壁升
堂振瑤珩絃歌移魯俗談笑却秦兵吐論珠璣落擣詞
錦繡生豈惟光照乘奚止價連城每念駕隨驥端如石
混瓊續貂陪下列變豹吞嘉名追琢蒙殊遇磨礱媿晚

成傾心惟向日接武濫登瀛寶婺暉彤邸奎章耀紫清
令辰開壽域佳氣拂宮楹共慶千秋節長懷萬古情為
藩匡帝室作鎮裕編氓武帳圍雲母仙壺列水晶龍箋
頒睿墨翠釜出華烹自揆披沙質空慙擲地聲受恩山
嶽重顧已羽毛輕碧樹烟初斂琪花雪乍晴願言三獻
祝圖報竭忠誠

一齋詩二十韻為工部趙侍郎賦

彼美冬卿倅揚芳國士林勤官常翼翼敬事每欽欽真

實全無妄純誠絕孔壬志專充浩氣欲寡抱冲襟適趣
闌飛動超情貫古今入虛原有見不顯亦如臨風秉孤
忠在寧容百慮侵寅恭行素位貞信竭丹忱錯節知良
器希聲閱大音久懷三獻璞獨畏四知金雅擅無雙譽
恒持不二心訓工銷蠹窳奉法戒惱淫安宅何由曠夷
途底費尋宸衷尤簡注天意匪難諶知己多韋布隨身
祇鶴琴馳驅王事切沐浴主恩深帶綰金花重冠峨玉
樹森輕裘明寶勒散紛挿瑤簪宮體詩頻詠仙壺酒謾

斟願崇莘野德長作傅岩霖

朱氏愛葵軒

苦憶愛葵翁栽花滿院紅
每來迎午日不肯媚春風
衛足能多智傾心獨抱忠
露含香霧重日炫綵雲空
杯側秋金燦堂圍畫錦紅
流芳貽奕世種德嗣前功
刈葉抽新穎培根發舊叢
永言同謝樹歲歲轉豐隆

題陸世昌長沙河官考滿送行卷

報政遠朝天趨程到日邊
官居荆楚地課進水衡錢
考

覈三司最庶平衆口傳共知懷橘孝須信斷葱賢却薰
承家訓儲財佐利權杯傾臨別酒詩滿送行篇五兩迎
風動孤蓬帶月牽嗟余今白首羨子正華年客舍欣重
會鄉關念舊緣相期圖報國莫後祖生鞭

奉令為戒定岩賦浮溫室

覺海平還靜澄源瑩匪渾因風生泡影出水動波痕鷗
鷺何曾避魚龍莫敢吞神珠涵象法明鏡燭乾坤共愛
圓光透寧期幻質存浮沈非有意起滅等無根總在虛

空界終歸寂定門老禪居靜室觀化坐朝昏

神龜詩并序

三十韻

皇上即位之三年將建太祖高皇帝功德碑選石於
龍潭之山果得鉅石入土深五尺許得石龜焉首足
尾甲纖悉畢具冬官進之於廷上命羣臣得縱觀於
奉天門莫不嗟嘆稱頌舉手加額以為由皇上孝誠
所感而致夫龜者神物四靈之一王者有體信達順
之德則至焉且尤為壽考問無不知此又為國家禎

祥之應皇祚萬世鞏固之徵臣某幸得與觀不勝驩
欣踴躍之至謹拜手稽首而獻詩曰

高帝膺乾運寰區奠地維冷風清瘴毒甘雨洗瘡痍九
服歸仁化三靈協睿思考文同遠邇議禮別華夷聖德
過堯禹神功邁昊羲鳳巢阿閣久龍去鼎湖悲已荷皇
天眷寧無大寶遺真人昇紫極正統嗣洪基述事追先
志持盈率舊規載詞敷盛美選石樹穹碑山骨深蹲虎
雲根闕伏龜祇應元氣母孕此石腸兒共訝瓊為質何

庸骨裹皮網中寧解得牀足可容支左顧猶延頸無求
詎朶頤尚疑登洛水還似出唐池卦畫排金甲疇文布
玉肌胚胎由氣化鑄琢匪人為大孝通玄宰精誠感嶽
祇十朋欣受益五總驗前知靈貺昭嘉慶貞符卜壽祺
直緣敦信順奚假決嫌疑獻瑞登金格呈祥進赤墀榮
光輝綵仗香靄拂黃麾百辟咸瞻仰重瞳屢悅怡明廷
充喜氣宣室受蕃禧薦廟同宗器臨軒備羽儀坤珍原
有待天意本無私太史書編簡歌工奏樂詩小臣三致

祝萬世樂雍熙

大祀南郊上元夜齋宿翰林中分韻得明字

圓丘嚴祀事齋署集文英
况值燒燈夕端為不夜城
碧霄雲翳斂滄海月華生
已受綸音戒都忘俗慮嬰
燭臺晴有燄鈴閣迴無聲
撫景傷衰暮蒙恩荷聖明
詩遲慙技拙心靜覺神清
坐聽譙樓鼓銅籠報二更

賦得孔林詩二十韻送王紀善從魯王殿下之國
太極分玄象斯文啓素王
化源開萬世道統繼三皇
配

合乾坤德昭宣日月光獲麟嗟絕筆夢奠感沾裳安宅
栖靈魄喬林蔭壽藏九原理玉骨重壤閔黃腸碑載龜
跌石墳封馬鬣坊山川雄地勢草樹發天香跡滿來觀
屨基存反築場古心承雨露和氣萃陰陽百里陰猶蔽
千年澤未央木多楷杖異蔓絕棘針荒鬼物加呵護胡
兒戒損戕不惟尊古檜奚止愛甘棠聖主崇名教親藩
胙土疆嗣封隆屏輔翊善賴才良境得周公國宮臨少
昊鄉德修敦禮樂業進重文章展敬還登廟聞音莫上

堂竚看匡導力青史見流芳

題雲間顧德潤靜趣軒

虛閣宜秋色層簷起夕陰端居捐末慮宴坐爽初心
息寒灰冷波澄皎月沈寂寥便野興恬默抱沖襟扶老
憑斑策陶情託素琴庭空芳草積門掩落花深酒熟呼
隣飲詩成據槁唵翻憐營利客底事費追尋

三華集卷十五

欽定四庫全書

三華集卷十六

明 錢仲益 撰

錦樹集六

七言排律

和蘇先生元日早朝韻

遠聞長樂曉鐘聲
綠樹珠燈照殿明
太史奏雲龍五色
伶倫協律鳳雙鳴
歷春令尊周典斗
轉寅杓紀夏正

立仗神駒長夾陛守闕馴象正當楹肅參法駕森冠冕
嚴衛勾陳簇旆旌未嘆馮唐年已暮却憐揚子賦先成
金穰應瑞歌豐稔玉燭調元樂太平慚媿白頭叨侍從
仰天三祝致微情

兵部方侍郎萬竿烟雨圖

夏卿文采動奎參種得篔簹綠滿林粉墨為塗烟雨景
廟堂不負歲寒心苔花沮洳涵秋色海氣模糊結晚陰
潤洗一川蒼雪冷濃拖千畝碧雲深舉頭夜起蟠龍勢

刷羽朝翔彩鳳吟香濕錦袍明燦燦班聯玉笋密森森
已瞻淇澳才如簣須信於陵價比金况值舜廷方製樂
會裁韶管奏仙音

送李奉祠得告還鄉

仙桂高攀踏綵蟾霜臺從事著公廉不惟辭令威儀肅
端信文章政事兼曾典邑庠勤教育未應太學厭糞鹽
芹香壁水恩波闊花滿琴壇化雨露佐治縣司稱愷悌
奉祠藩府更清嚴伯夷自昔能司禮李緯誰云但美髯

協樂有時調趙瑟讀書終日閉湘簾莊吟底事惟思越
墨突由來不暇黔去國暫令離觀闕省親還得返閭閻
風輕弱柳搖金縷雨霽空江瑩寶奩沙際繫舟維錦纜
柳邊沽酒出青帘辭榮故里丹心在拜慶高堂喜氣添
漢室安車徵野逸楚筵虛席待幽潛鴻毛有待天風便
驥足那容阜樞淹送別漸看雲渺渺遠懷空望月纖纖
鶴書指日來催召未許山林久養恬

三華集卷十六

欽定四庫全書

三華集卷十七

明 錢仲益 撰

錦樹集七

五言古詩

送范宗暉赴雲南從軍

投老怕送別送別即傷神况茲所別者乃是平生親
行赴何許遠在天之垠迢迢萬里餘欲見將何因近別

猶不堪遠別情曷伸始知交密友不若交疎人我昔初
還鄉憔悴賤且貧子來客吾邑漂泊埋風塵一見如舊
識歲久情逾真自謂同心交不獨雷與陳我入訓鄉校
子來寓城闈燕語恒及酉諷詠或達晨中間罹變故別
我遊江濱陶朱既遠越張祿遂入秦間闕幾四載會晤
復喜頻明年上京都聘充戚里賓我亦被薦書謁選拜
紫宸繆居容臺屬幸得聯朝紳與間復聚首相見不隔
旬念子有俊才倜儻無儔倫財輕大義重實謂勇且仁

願言永相從
誨語煩諄諄
夫何事難料
告別何踈踈
從軍赴溟陽
西去逾峨岷
吾皇啓昌運
萬物皆維新
及茲艷陽月
鶯花曜青春
惜子獨遠去
書劍行隨身
騏驥豈絀羈
鵬鷲非籠馴
丈夫志四方
豈必長相隣
嗟我已暮齒
雙鬢垂秋銀
愛刃割老腸
容易生酸辛
于時在史館
寅入出巳申
不暇持一觴
送子龍河漣
江水流滔滔
楚山青嶙峋
咄此可奈何
淚下沾衣巾

題王孟端畫送祖韶石歸惠山

危石壓寒篠高松掛枯藤長懷故山景况見故山僧僧
今歸故山我歸嗟未能題時送僧歸悵然離思增

程氏蘿山隱居

蘿山何盤盤縈迴古城隅中有隱君子於焉卜幽居是
時初雨霽綠樹陰扶疎霏霏雲入簷瀲灩泉鳴除方春
出荷鋤秋水或可魚緬彼紫陽里遺風尚沾濡卒歲豈無
裳教子亦有書俛仰足自樂聲利將焉如

齋宿翰林聽沈檢討彈琴分韻得燈字

聖皇重郊祀聞戒恒兢兢齋宿玉堂署共集金蘭朋談
柄方疊疊熒煌粲華燈今夕復何夕同此瀛洲登聽鼓
綠綺琴拂拭朱絲繩初如鳴岡鳳嗷嗷日初昇又如幽
澗泉泠泠瀉春冰杳渺不可狀掩抑情何勝虞歌悵既
遠襄教亦莫徵知音無高山絕調沈廣陵寥寥太古音
千載誰復能若人抱竒才令譽衆所詭下指發妙意於
何得師承况今文明運禮樂方當興以茲絃歌化至和
庶其凝嗟予臨老大世紛非所膺忽聞陽春曲坐使煩

襟澄于時春氣微夜寒襲青綾曲罷殘月落餘暉轉觚
稜分題紀佳會用以書剡藤

黃惟益一樂堂

人生有三樂一樂實在天兄弟幸無故雙親盡高年茲
樂天所福非人力能專宣尼古至聖孟氏為大賢皆云
早喪父後喪或逾前美哉黃孝子歷世居莆田文獻出
故家詩禮猶相傳阿翁既壽考阿嬾亦華顛金昆與玉
季五輩相差肩庭椿布嘉蔭堂諼發春妍瑟琴日和鳴

熏麈互相宣
娑娑坐堂上
諸孫笑相牽
持酒介眉壽
綵舞衣翩翩
簾影捲晴旭
爐香霏煖煙
和氣充里閭
一笑顏歡然
顧彼天壤間
此樂真無邊
中郎富才學
下筆如流泉
折得月中桂
已作瀛洲仙
授經親王府
廣廈敷絺旃
應教侍玄室
曳裾登講筵
自非純孝感
何由格幽玄
嗟我生五齡
慈母早棄捐
中年出宦遊
湖海長留連
歸來身老大
生計惟空拳
家貧養吾翁
不能具甘鮮
及今獲祿食
親歿不可延
欲養親不待
感嘆長自憐
造化豈

有私於我懷慳偏羨君亦何修至樂爾獨全登君一樂
堂潸然賦詩篇

代人送白給事中歸毘陵省親

與君同郡居况是同年友少年擢高科沐浴聖恩厚顧
我駑蹇材濫逐車塵後君昔在禮科給事即真授我蒙
放還鄉留家七月久今年我趨朝重喜得聚首君今欲
歸去得告向東走嗟我獨留京乍見惜分手明當送君
別愁折都門柳君歸拜具慶捧觴介眉壽却思世間人

此樂誰得有未能逐君歸聊勸一杯酒

送程長史

程君家鄱陽儒業承世澤元季遭亂離跨海理商舶其
家素饒貲倍息額有獲居安而擇地遂作流求客流求
國南海壤地亦褊窄皇明啓昌運伐罪怒斯赫南征北
乃怨舞羽苗已格天戈之所指孰敢小抗格六合為一
家奚有山海隔君常勸其王當識理順逆歸心堅事大
庶可保社稷其王用其言貢獻相接跡充庭列筐篚名

欽定四庫全書

三華集
卷十七

五

馬侑玉帛先帝嘉其忠王爵錫封冊屢詢彼何人謀國
善贊畫乃知出程君一一盡其策皇心則大喜特勅賜
冠幘擢官作典簿期使夷俗革及今三十載自壯至髮
白君來忽陳情蹈舞三扣額臣老思故鄉願返舊田宅
皇仁憫其衰俞允不加責超升為長史階授五品職結
廬芝山下原田接阡陌鑿石甃魚池挿木樹雞柵娟娟
映花竹鬱鬱蔭松柏去時隣家兒學語尚咿軋今來見
羅拜長大過半百旨酒會間里情話悅親戚堂前舊巢

燕飛來似曾識自期樂閒身終老得散適我皇紹大統
正位履宸極洪恩若天覆萬國歸化域具王奉表奏臣
幼新襲國思求老成人賴以相輔翼帝曰程長史必爾
無以易起君自家鄉再展天池翼君年七十四強健無
與敵功名與貴富終始獨兼得有如班定遠萬里飛肉
食人生孰有此實謂備齒德始知行篤敬信可行蠻貊
題詩送君去撫卷為太息

中秋翰林夜集分韻得月字

雨餘殘暑謝夜久官事歇庭空起高飈雲霄吐華月于
時秋方半自昔為佳節殘荷綠已碎古桂黃初發況居
玉堂署幽勝景殊絕於馬集僚友清燕足怡悅送鉤行
觴頻分韻催詩切玉輪懸中天光輝轉明潔有如坐冰
壺爽氣徹肌骨微聞更漏響漸見明河沒人生寡歡會
圓魄亦易缺莫辭適夕玩動是經年別

送安仁進士李復觀赴邵武知縣

我友許安叔典學居安仁為言得佳友才敏性孔淳讀

書若注水下筆尤驚人喬出隴西族奕世聯朝紳乃祖
侯齋翁抱道終其身積善有餘慶後嗣必獲信于今見
賢孫邈馬寡儔倫我初聞此言願識歎未因去年會春
試來充觀國賓一舉中高等流譽何振振我時在史館
校書典絲綸覩子唱名日拜恩朝紫宸朝下始識面文
采殊彬彬聖皇啓文運禮樂為陶甄仁化被四海萬物
歸陽春正當昇平世見此金麒麟有如照乘珠信為曠
代珍始思許生言稱美良為真自茲益相密藹然情意

親有時過寒舍夜語直達晨夫何許氏子得疾俄爾淪
及今每見子痛淚恒沾巾維茲九月初別我之南閩出
宰邵武縣送子都城閩驛駟越千里鷗鷺橫蒼旻丈夫
誓許國豈徒得因循要展經濟才以活疲瘵民嗟我瀕
暮齒兩鬢垂秋銀每與親友別作惡殊傷神涼風吹我
裾竚立望行塵到時惠書札慰我心悲辛

送方學正赴北京行國監

吾友戴時省司訓寶應學每談方廣文才器殊卓犖有

如雞羣中見此孤鷺鷥我雖未識君嚮仰若喬嶽常願
得會晤誨語煩切琢典學逾十年聲聞日驚爆翰林諸
文士推譽咸嗷嗷今年及書滿謁選特超擢助教行司
成之官上燕涿北京龍潛地民俗頗愿慤自從淳風降
小智鑿太樸師道久云廢正學孰與推施教如捕風莽
蕩不可捉吾皇紹大統致治先禮樂彰善黜頑鄙揚清
激貪濁興賢重文化期用返古樸授君國學正恩意亦
已渥方將展抱負嶄然奮頭角橫經講古道用以覺後

金史卷之八十七
卷十七
覺茲晨欲行邁起聽雞喔喔春江雨新霽芳洲採蘭葯
風順潮水平飛帆去如趨嗟我身老大白首甘齷齪夙
昔慕高誼不及手一握仰望鵬程遠空令歎蜩鷲

陳氏蘭蕙軒

蘭蕙本同族臭味亦似之兄弟乃至親分形實連枝小
草尚知本天倫那可虧賢哉陳家郎家世業眼醫昔居
錢塘城佳名四方馳妙術既上聞名至居京師先翁痛
捐館伯仲相怡怡同居四十載共食不異炊賣藥得錢

物公貯無藏私軒前有隙地蘭蕙森猗猗年年七月時
滿室香風吹或採紉作佩或綴以為帷豈須百畝樹奚
用九畹滋止茲一席間奕奕羅階墀綠葉紛旖旎紫花
秀葳蕤金昆與玉季燕坐鳴壘麓友悌式相好終始不
少移吁嗟淳風降末俗日以漓奪食或紛臂煮豆仍燃
萁胡為骨肉恩翻作參商離使聞陳氏風名教豈小裨
因登蘭蕙軒慷慨歌此詩

詠古松

蒼蒼老松樹託根山之阿雖非梁棟材亦負鐵石柯幸
承雨露恩閱歲既已多昔當陽春時韶光正妍和羣花
盡吐艷紅紫分猗難遊人競賞玩喧喧恣酣歌顧彼老
醜姿憔悴纏藤蘿豈無凌雲志往往遭折磨牧豎加剪
侮誰復為摩挲傍覘得時花落莫無經過猶如緼袍士
不耻並綺羅貧翁見富子孰敢捩眼省秋霜有時至奈
此搖落何向來芳華者枯槁惟株科松乎獨後凋秀色
方婆娑物理固如此造物匪有頗但堅歲寒心勿用悲

蹉跎

田進士父挽詩

田生閩佳士及第方青年一舉擢巍科錫宴瓊林筵校
書入龍禁手披百家編我昔與編摩几席恒相連今朝
著衰服別我將南旋我驚問其故血淚如迸泉自言有
嚴翁白髮紛滿顛早承家庭訓詩禮猶相傳義方教諸
子鞠育恩無偏自從離膝下夢寐長相牽昨日訃音至
哀慟痛徹天我雖未識翁見生孝且妍有子才若此足

知翁之賢云何棄榮養乘雲遽登仙念生失所怙斃斃
亦堪憐迢遞七閩道里數逾三千含悲送生歸為歌蒿
里篇

為太學生王彥文賦瞻雲詩

朝看白雲出暮看白雲歸白雲本無心朝暮長霏霏嗟
我久行邁不得覲庭闈念我堂上親白髮日以稀吾鄉
豈云遠近在京之畿豈無懷歸心王事靡敢違辭親既
許國兩全安可幾遙瞻雲飛處下有親門扉雲出還歸

來我心轉依依願托今夕夢隨雲向南飛還家見親面
堂上舞綵衣夢覺雲亦散悵然空歎唏永言盡忠孝庶
以報春暉

送華叔端訪舊還無錫并簡莫士安助教

華生吾鄉彥眉目秀而瞭時方在青年珠玉光瓊瓌下
筆辭藻嚴五色雲縹緲系出故家子箕裘業克紹於我
有世親乃祖實中表生婦又我姪重疊婚姻繞弱歲不
好弄重厚靡輕佻我昔訓鄉校供職媿才謏生時居南

郭敬我情匪矯休日過其舍歡迎不厭擾我從入朝行
十見梅實標年老念親故每歎音信杳前日在隣家生
適至京兆邂逅相見間欣喜欲起趨殷勤叙間闊疊疊
談不了千里來訪舊此事今亦少一樽聊相勸稍慰憂
心悄是時春雨霽桃萼紅猶小東風吹楊柳萬縷黃嫋
嫋云何遽言別留挽頭逾掉荅言東作興農事功方肇
嗟我被恩澤茫若波浩漑戀闕不忍去補報乏芒杪遲
明將整駕臥聽雞戒曉作詩送生歸目盡孤帆杪何處

惱愁心格磔花上鳥歸時見莫翁為勞心應勦

為僧賦些子軒

上人棲禪地構此方丈室還將茅蓋頭僅使席容膝是
身同虛空寬隘爾等一誰云如斗大洞視被萬物乃知
蝸牛廬即是獅子窟夕雲闕松關花雨散經帙心境兩
俱忘焚香坐終日

送湯彥常訪舊還吳中

人生有五倫朋友居其一既稱金蘭契患難宜救卹吁

嗟淳風降友道久已失方其結交時杯酒相狎暱座上出
妻子慷慨指天日一朝苟異勢過門不入室或反加擠
排陽厚陰肆疾吾觀此輩人禽獸豈足匹賢哉湯高士
年及十者七隱居吳門市好禮直而質結交韓伯休投
分逾肉骨兩家諸昆仲相親等弟姪韓公既捐館後嗣
好轉密韓氏有賢季世業究醫術往年徵至京官授八
品秩偶遭狂夫累從坐遭責詰高士聞其故驚遑重憂
鬱倉忙命舟車匍匐不暇佚到京五百里速若鳥飛疾

餽餉問安否厚意難備述當今聖明主臨照如日月
心自無私昭暉燭萬物宥過罪無大星誤盡獲雪韓公
尋見釋善人保終吉高士始相見勞苦喜色溢留連過
浹旬告歸不忍別正當春陽時楊柳青可折茲晨駕言
旋握手語未畢時賢高其行餞贈詩滿帙我聞心企慕
詢問得其實范張約雞黍陳雷比膠漆張高夢中尋嵇
呂千里轍乃今見斯人古道幸復出益知人心良天理
詎容滅顧彼輕薄兒視此足愧忸願言激流俗用紀太

史筆

子猷訪戴圖

為吳子莊
經歷賦

子昔稱曠達莫若王子猷軍府事不理長年恣酣游馬
死固知數嘯傲輕王侯方居山陰時雪夜泛小舟遠訪
戴安道不憚路阻修乘興到剡溪嚴寒襲重裘及門不
相見興盡即回頭至今千載下景仰號風流思昔典午
氏亡國盖有由士習賤名檢清談駕虛浮倡始自王何流
弊極阮劉作官肆貪放居喪縱觥籌自謂宗老莊豈識

尊魯鄒所以禮法士疾之甚仇讎三綱既淪斃馴致喪
神州胡塵暗中華迭舉三百秋餘風到江左波浪不可
收王綱既解紐末俗日以偷厭厭氣纔屬痼疾誰能瘳
何人繪斯圖寶傳若琳璆吳生偶得之賦詠爭賡酬當
今聖明世德化過虞周為國重名教取士貴潔修若人
東吳彥才幹素所優起家典戎幕政事無滯留視彼拄
笏者何異薰與蕕觀圖用自儆慎無效其尤

弈碁詩

我老無所好所好惟奕碁每遇對手敵竟夕不告疲不
惟忘憂樂寧復知飽飢方當得意時如病逢良醫又如
好飲人妙趣祇自知坐有不懈者恒睨恒顰眉接談未
免畧應荅惟領頤要以適餘年匪欲勞心思為語旁觀
子無煩加詆嗤

守制還村居寫懷寄朱逢吉莫士安

我從入朝行已更十春秋自知乏時用况爾白滿頭譬
如夜行人漏盡不肯休無補糜廩祿蒙恩竟何酬惟有

一寸心願忠寧自謀可憐食美芹恒懷獻宸旒詎知大
官厨列鼎羅珍羞區區不忘君豈顧不見收幸逢聖明
主寬貸不我尤終然天降割俄丁母喪憂得告歸守制
還鄉尋舊丘屏居傍農圃泣血淚松楸雖云處苦塊無
煩聽更籌衰年哀毀餘稍亦便優游日晏睡方覺起處
頗自由嘉樹繞我廬綠秧盈我疇解帶坐深竹濯足臨
清流散髮脫巾幘捧腹親鋤耰閉門無來轍忘機有沙
鷗緬懷平生友託交實綢繆若人重道義邈焉良寡儔

相去豈云遠契闊令人愁安得近我居有懷即相投嗟
我久行邁舊業廢箕裘及茲見桑梓餘生等浮漚乘流
且復行遇坎則止留得喪惟任運此外將奚求所願從
夫子講道說孔周何時肯過我無乘剡溪舟

萬安山樵

侵晨採藥去日暮採樵歸晨出霧未斂暮歸陽已微朝
夕惟採樵丁丁響岩扉行歌振林木風驚白雲飛負薪
易斗粟亦足療我飢濁酒聊自勞五絃手中揮人生貴

適意富貴非所希嗟彼覆盆生胡為慕輕肥賢哉採樵翁有道或庶幾

題族姪公達重建種德堂卷

我家自高曾定居南湖傍積善以起家孫謀貽久長為
糜廩餓夫貸粟不責償至今鄉里間故老猶稱揚吳興
趙文敏擅名翰墨塲種德揭華扁大書題其堂昔當元
盛時室屋遙相望子孫過干指家道日以昌後來遭元
季兵戈紛擾攘鄉民弄鋤梃剽略爭跳梁向來繁華地

剪燬為荆荒皇明啓新運聖德超虞唐四海底治平流
民盡還鄉復業理生產築室開耕桑吾宗有令弟好禮
崇文章其子曰發者賦性尤淳良離祖建別業新構殊
輝煌顏堂踵舊名意在昭流芳欲使先祖訓常目不敢
忘此志亦可嘉種德非無方要須蹈其實庶心無愧惶
我常叙其卷訓飭加周防我今客京華典禮官太常乃
父持卷來慰我心傍徨拜請復乞言篤志日以彰始勤
勿終怠天命斯降康延慶及瓜瓞老伯與有光于時倘

未死尚當持一觴

欽定四庫全書

三華集
卷十七

十七

三華集卷十七

欽定四庫全書

三華集卷十八

明 錢仲益 撰

錦樹集八

七言古體

送陳指揮還常德

都門二月春正妍
官街弱柳搖春烟
江頭下馬送君別
短歌一曲心懸懸
我昔梁溪訓鄉校
此時識君方少年

雙瞳如漆面如玉錦袍白馬人中仙停舟訪我讀書舍
手持大軸徵詩篇我時醉後了不覺信筆寫遍桃花箋
別來轉眼十五載幾回望月天邊圓君居西州典名鎮
每煩書札遙相傳我亦蒙恩入翰苑祇有夢寐長相牽
去年歲底忽邂逅始知奏課來朝天君顏非昔我衰邁
話舊小立交衢邊相逢未幾遽欲別束裝又買西江船
人生離多懽會少把袂欲別還潛然方今聖皇選侍從
文武並用恩無偏要須安邊建勲業著鞭莫使他人先

行當歸朝佐天子兜鍪自昔生貂蟬欲知惜別意深淺
試看池水流潺湲

和松泉上人見寄韻

嗟我平生似鳩拙落魄羞營兔三六曾從開士叩真詮
拈出機鋒盡斬絕遠寄蘭章慰離索有似洪鑪銷片雪
幾時飛錫到京師長使相從不相別

送孟用賓服闋赴京

太湖五月南風起高浪駕天三百里孟侯詞翰捲波濤

泮渙汪茫勢相比君侯自是忠孝家垂勲史冊生光華
前朝賜書今尚在故老往往能傳誇湖州府君耽隱計
結屋西山官早棄我為兒時常拜之父祖通家已三世
後經喪亂兵燹餘蹤竄走無寧居爾翁起家贄分闔
磨墨盾鼻揮軍書我客山陰偶相接舊約新知兩歡愜
酒船看遍鏡湖花雨牀聽盡稽山葉此時君家在吳下
世故紛紜若奔馬向來俛仰二十年感念存亡泪成把
大明撫運開文明搜羅俊良濟治平寸長小善率見錄

詎使草野遺賢英君抱瓌才負奇氣妙年卓犖青雲器
未容濁水掩摩尼終見天池產騏驎薦書蜚聲騰九重
翻然獻賦蓬萊宮朝陽初升海色動獨有孤鳳鳴梧桐
紫皇峨峨坐南面臚傳遠下麒麟殿曉隨龍仗拜楓宸
夕縮魚符宰花縣三年奏課功最優風行百里如傳郵
進登王官佐藩邸坐令曹府生清秋應教金闈侍玄室
責難陳善操直筆才欺梁客兔園詞道黜淮仙鴻寶術
前年辭官出國門執喪暫住陳家村我從南歸始相見

知君乃是湖州孫共說當年結交意出處不同榮辱異
我甘衰謝君壯年不遺形骸隔心志今年制服當告終
鶴書催上浮雲驄州家申名選家擬鴻毛一舉隨天風
我昔蒙恩忝微祿孤忠未展身先覆十生九死許還鄉
甘旨家貧常不足送君去去何當還手攀若木捫天闕
丈夫雖云四方志依然離別傷心顏我困泥途已頭白
君上雲霄生羽翮莫辭執手尚躊躇從此雲泥兩相隔
送無錫楊主簿升縣丞

河東楊君美才彥憶昨初來佐花縣我時司訓在學齋
北郭迎君新識面自從視篆居琴堂廩無餘粟家無藏
居民愛簿若父母鷹鷂豈得儕鸞凰三載超朝較勞績
曾見天官書第一我時承乏上容臺草草送君還舊職
吾皇紹統開太平大明麗極妖氛清夫何吾鄉衆凶豎
敢肆劫掠尤縱橫嘯呼持矛紅帕首市里蕭條絕雞狗
楊君奮起集縣僚擒縛渠魁殄羣醜事聞司勳達聖聰
天顏懼動嘉其功勅頒楮錙進官秩君超二令哦雙松

至今鄉民獲安堵春日作田秋作圃為君慷慨作長歌
留待他年編樂府

戰馬歌奉令作

房星耀四極流光落龍堆儲精產神驥八尺真龍媒何
年西來獻閭闔萬里瞬息飛風雷肉髮虎脊高崔嵬躡
地不動無驚埃豈比一疋練不數七尺駉白羲與紫燕
下視俱駑駘王師奉天命南征下江淮乘之大小七十
戰南衆望風先已摧屹然當陣如立壁猛氣凌空勢無

敵仰天奮迅時一鳴萬馬震驚皆辟易曾著六矢不動
身其鋒銳若雷將軍橫行掉尾不畏逐赤汗散作桃花
雲聖人開天百靈助靈物由來鬼神護一掃妖氛四海
清萬世洪基永堅固從此罷征戰與國成大功至今駭
逸不少減肯甘伏櫪思追風圉人愛護重如寶養養敢
將凡馬同被以黃金鞍絡以珍珠籠朝飲靈泉乾夕秣
神草空太平不用巡瑤水長年立仗衛金宮

永樂丙戌二月十二日伏蒙殿下賜觀所建便殿

退而作詩奉進

鶴禁深嚴開曙早玄圃卿雲壓瑤草宮門咫尺近蓬萊
長駐四時春不老旃檀小殿祠金仙珠燈寶塔珊瑚筵
坐祝洪禧遍寰宇我皇萬壽齊堯天銀塘水煖搖新綠
瑞綵榮光炫晴旭願借緱山白玉笙吹作長生太平曲
大將軍八面威風歌奉令作

聖皇繼統御八極海宇清寧戰爭息平時兵備不可忘
賢王校武宣威德身居玉帳臨三軍牙旗雙立開轅門

周圍森擁百萬甲劍氣射落秋空雲列陣紛紜布中野
羽扇輕揮傳令下彎弧一箭墜天狼銃鼓喧轟馳萬馬
白虎叫嘯蒼龍搏朱鳥展翼玄蛇蟠機衡圓轉妙莫測
天地變色風雲寒我皇尚德非尚力仁者由來古無敵
要令威武振皇風坐靖中華制夷狄賢王忠孝輔聖明
八方賓伏乾坤清從茲兵革永不試萬歲千秋歌太平

趙指揮藏趙學士畫馬圖

春郊雨晴莎草長奚官放馬平沙場曾駕鑾輿出巡幸

滿身猶帶宮袍香玉堂學士多清暇不獨工書復工畫
貌得天閑十六龍筆底風雷驚變化或嘶或立或飲泉
紫霞赤玉金連錢雄姿逸態五色亂雲錦爛然花滿川
天策將軍性英邁寶匣深藏發光怪勸君須覓九方臯
要求牝牡驪黃外

鶴背天風奉令作

緱山古仙伯學道功已成翩然跨白鶴翱翔遊太清天
風駕六翮兩袖飄飄輕鶴背穩若舟瞬息萬里程朝發

瑤池暮蓬瀛灑氣徹骨冰壺明身披紫綺裘手弄白玉
笙玉笙吹入碧雲去長空一片秋煙橫風送餘音落寥
廓滿天散作鸞鳳鳴十絕靈旂五綵旌金童玉女遙相
迎世人矯首盡羅拜望之不見惟聞聲願得從風附驥
尾相隨謁帝朝天京

紫府羣仙奉令作

綵雲激灑丹霞開紫皇金闕高崔嵬珠光玉氣相洞射
白日照耀瓊瑤臺簇簇霓旌間霞旆宮中坐列羣仙會

風傳廣樂下鈞天縹緲遺音九霄外寶燈仙人玉葉冠
冰綃辟塵犀辟寒上元已來王母至蟠桃磊落堆金盤
鸞翔鳳舞紛雜出麟脯龍根盡靈物願乞天漿賜一杯
坐使凡夫換仙骨

廣寒宮曲奉令作

若有人兮控飛龍度銀橋兮遊月宮月中桂樹八千尺
天花萬斛飄香風瓊樓玉宇空中起貝闕珠宮瑩秋水
絳河流碧洗冰輪倒映山河清見底花邊美人乘白鸞

五銖衣薄雲肌寒夜深舞罷羽衣曲蟾蜍影浸玻璃盤
雪毛仙兔擘雙肘搗藥長年親杵臼合成一塊紫金霜
獻與君王祝長壽

上雲樂奉令賦

盤古始開闢元氣分陰陽金天孕得雛其名曰文康生
成一塊謫怪貌目睛碧綠深丹睚白頭廣額面漆黑赤
毛滿頰鬚金黃帽茸捲雪裘披霜金環墜耳垂肩膀手
振響鐵聲玲琅天子握赤符受朝坐明堂九夷百蠻盡

朝貢冰山桂海皆梯航文康亦自月窟來進獻獅子與
鳳凰按胡舞唱胡曲合雙掌頓兩足語音嗚咿九譯乃
通服裝詭異紆青曳紅仰聖化歸皇風進閭闔朝法宮
扣額呼萬歲稽首瞻重瞳泰元神策一十二萬九千六
百年與天地相始終請編三會圖流示萬世傳無窮

大將南征歌奉令作

聖皇開天寰宇康百蠻萬國皆來王蠢爾交蠻亦何物
倔强海島猶鴟張我皇赫怒威無外特勅邠公爾為帥

爾今統率百萬師即往南征問其罪所誅蠻酋止一人
慎勿縱掠傷吾民將軍稽首拜皇命兵行捷速驚如神
樓船飛渡過閩海牂牁下瀨俱來會將軍馬上揮瑠玕
指顧風生齊步隊材官鐵騎爭前驅劍光射日金芙蓉
區區羣醜聚蟻穴敢伸螳臂當奔車揮霍旌旗震鼙鼓
萬夫拔柵齊同舉已看繫頸請長纓何用分邊立銅柱
從茲一舉南海清氛煙不起民安生歸來奏凱報天子
千秋萬歲歌昇平

廬山謠奉令作

匡廬之山何巖崿突然萬丈青入空何年鑿破混沌竅
此地直與銀河通女媧鍊出補天石神物變化非人工
亭亭一柱鎮兩紀羣山環拱江潮宗却疑山靈擘山裂
白雲中斷飛玉虹紫嵐夜滴瑤海月赤霞朝射金仙宮
天香滿空花漠漠露氣一片秋濛濛靈潭浩蕩不見底
石窟冰冷盤蛟龍千迴萬轉路不定崖谷處處聞笙鐘
躋攀絕頂一長嘯天門萬里生秋風金雞初鳴海波立

日華照耀扶桑東一杯弱水半清淺寒色與翫青如銅
錦袍仙人舊遊處至今醉墨留雲松便欲乘風躡雲去
清都謁帝登璇穹願乞長生賜寶訣得駐倒景延青童
長侍吹笙從鶴駕遨遊還逐浮丘公

蓬萊曉色奉令作

滄溟弱水浮蓬萊六螯戴出通天臺金雞初鳴海色動
紫霞散落紅雲開火輪水底忽飛出萬里紅波半天赤
遙看綵仗引羣仙翳鳳驂鸞朝太乙珊瑚碧樹交青葱

穹樓傑閣空明中氛埃隔斷飛不到寶鈴夏激流天風
秦皇漢武亦何故徐福來歸藥大去謾求靈藥度長生
風舟欲至終無路聖皇當天開早朝天闕曉闕聞簫韶
卿雲五色捧宸座環珮鏘鏘遺九霄羣玉峰巒間瑶草
萬歲桃花春不老蓬萊始信在人間何用求仙覓三島

肖翁九龍圖

肖翁畫龍如得仙筆端頃刻驚蜿蜒一龍盤屈波底卧
春雷未動潛深淵一龍奮迅張鱗甲擘崖飛出巴山峽

一龍怒鼓春江濤濤聲捲海翻鯨鼈一龍躍過禹門裏
電光熒熒燒龍尾一龍昇天作甘霖大洗枯旱蘇民心
一龍飛騰入天路橫絕虛空駕雲霧一龍戰罷沙水濱
玄黃靈氣紛氤氳一龍引子獨出水斂浪鞭霆欲飛起
九龍變化筆力工展面一見知雌雄肖翁此畫雖絕筆
惜哉未是真神物真龍撫運飛天達潛見飛躍俱隨時
風雲際會當九五何幸吾身親見之

風月雙清奉令作

涼風蕭蕭江月明長空一碧流江聲瓊田玉界三萬頃
湛然徹底冰壺清綠雲銷盡光輝發爽氣侵肌浸毛髮
盡將佳趣寫琴心更覺冰絃響清越天籟泠泠桂影移
暗泉滴瀝鳴珠璣離鸞別鵠去不返落花殘雪參差飛
君王曾次涵秋玉坐理金徽瀉秋瀑恨無宋玉仲宣才
倚和蘭臺廣寒曲

雲中鳳奉令作

丹穴有靈鳥文采備五色醴泉以為飲竹實以為食朝

入青雲翔暮向瓊樹息一飛至北海高風送彩翮本非
樊籠物豈避弓繳射我聞此鳥真火精所至之國民安
寧軒轅至德動天地曾巢阿閣相和鳴金天出治亦復
至用以紀歷頒官名放勳重華相繼作聲協簫韶諧九
成文謨武烈周德盛來止岐山遊紫庭胡為數向潁川
集却指鶡雀欺愚氓邇來寥寥不復見漫栽梧竹阿旁
城當今聖主履天位四海太平稱至治神龜自出騶虞
生疊見貞符薦嘉瑞鳳兮鳳兮千仞飛覽德際此文明

期銜圖振翼下雲表九苞七德續來儀朝陽初昇海色
動竚聽噦噦鳴華池

紫芝山房奉令為鄭尚書作

武夷山山開洞天何年芝草生其巔武夷仙人去已遠
紫芝山名今尚傳試看石上產芝處赤霞熒熒飛祥煙
夜光洞草豈足比一枝入口延長年金堂玉室閔奇勝
不獨秀異儲靈仙山川清氣有鍾屬茲地徃徃生才賢
鄭崇結屋住其下坐對青山窮簡編題詩曉刻林下竹

讀易夜漱溪邊泉聖皇開天啓文運一舉首入瓊林筵
邇來平步至台鼎手攀北斗青雲邊願調玉燭補袞職
旋斡太和蒸八埏年歲豐登萬寶就嘉禾瑞麥連原田
熙熙鼓腹民氣樂百姓飽足無顛連却笑當年園綺輩
槁死窮山真可憐

寄永春侯丙戌九月奉令賦

楚江雲銷涼雨歇佳氣浮空滿雙闕鳳城九月秋色殘
自昔重陽稱令節茱萸弄色黃菊香鍾山曉色橫蒼蒼

君王對此興不淺浩然氣壓吳天長援筆題詩不停手
弔古興懷重回首江州刺史近何人誰送東籬一壺酒
登臨四望心豁然日華潑灑浮瓊筵龍山事往不足問
鴈聲叫落江南煙杜陵野老身微賤預憂未卜明年健
自慙白髮老儒臣長奉金輿侍遊宴

為李生賦白雲歌

生四川人也

蜀山高高多白雲山人結屋雲為隣高堂雙親盡無恙
婆娑兩鬢垂秋銀辛勤奉養十餘口白雲深處躬耕耘

自從辭親出為吏五年踏遍京華春故鄉西望不可見
惟有白雲隨我身從龍祖方到闕下英英脈脈還氤氳
梨花柳絮散不一舉頭見雲如見親誰云無心偶出岫
有若慰我心殷殷隨風飛來復飛去萬里瞬息歸峨岷
定來親舍簷下宿依依入戶如歸人我親寄問強健否
殷勤為託雲中君

為王紀善賦獨秀山房歌

樊川自昔佳山水一峯獨秀空中起亭亭削出碧芙蓉

影落太湖三百里金堂玉室閔洞天茲地往往生才賢
山川清氣有鍾屬豈獨幽勝儲靈仙樊川高士王夫子
結屋深棲白雲裏雨晴嵐氣滴研池日煖松陰流棊几
栖遲泉石卧煙霞百年詩禮猶傳家行人錯認武陵道
春風夾岸開桃花前年徵書催赴闕勅輔親藩事朝謁
相隨五載到京華祇有山房舊時月丈夫出處各有時
故山猿鶴何由知讀書致用在明世山靈莫誦鍾山移

桂香清晝詩

毘陵張生美無比炯炯雙瞳剪秋水早年才選入黌宮
落筆翩翩殊未已庭前不種兒女花萬株古桂來仙家
獨步瓊林弄秋色肯隨桃李爭春華曉露濃濃濯晴旭
滿貯天香三萬斛雲影低垂翠羽旗日華照耀黃金粟
花前讀書花下吟祗應仙友能知心亦知竇氏有陰德
等閒玉樹俱成陰明年好借吳剛斧快躡雲梯催步武
折取蟾宮第一枝坐使流芳遍寰宇

欽和御製靈谷寺寶塔瑞影詩

萬生營營天壤間誰能出離生死關豈知大法本無外
芥子可納須彌山先皇應運龍飛起四海歸心若流水
奠安宇宙指麾邊汎掃氛埃談笑裏橫拚日域通天河
四海鼓舞涵恩波仁風化雨遍寰寓水天桂海咸遮羅
兼收惡弱攻頑昧超越唐虞邁三代我皇紹統開太平
繼述惟尊舊章在儒明綱常釋悟空三教至理原皆同
至人遠從西域至法界盡入光明中本性無成亦無毀
由來萬象同一體能因幻境悟真如始覺空花眩青紫

為人說法破三惑洗滌身心解微纏金雞銜粟鳥銜花
坐使靈山在中國達磨昔自金天西東來傳心度愚迷
千年如來再出世慧燈照徹如玻璃窳堵宮堯起靈谷
寶藏神珠光熒煜金仙現象影巍巍天女散花香馥馥
日華照耀眉間光燦破暗網開昏茫小臣幸獲覩竒瑞
入觀聖蹟登長廊丈室衡從才咫尺滿屋通明不知夕
燦然七級影玲瓏百丈總收歸寸隙宸章輝映蓮花臺
却慙補報無涓埃泰元神策十三萬仰祝聖歷齊天開

奎光煥赫蒼龍繞雲漢昭回碧天皎更資神化祚皇家
萬世長如日初曉

又

西方至人得大覺道果天成匪由學混然有物在虛空
圓陀陀兮光爍爍有非真有無非無靈虛不動長如如
絕勝達磨人不識翩然去踏西江蘆大板雷音出敷演
廣濟羣迷脫輪轉還披雞足舊藏衣底用扶桑如甕繭
巍巍丈六黃金身瞭然獨破三生因我皇至德遠相感

受朝萬國昇金輪萬里西來謁天子拈出機鋒盡玄理
一輪皎月懸秋空宴坐湛然塵不起光明寂照證圓成
始知佛性同衆生盡令究竟入三昧不異睡熟聞鐘聲
一彈指頃三千劫願悟真乘了緣業幸生聖世樂昇平
上瑞奇祥見重疊神龜自出騶虞來嘉禾同穎金蓮開
醴泉涌溢歲年稔咸躋壽域登春臺自昔何人曾見佛
忽覩如來歎奇崛恰如鉅野聽咸池驚破昏愚明恍惚
靈山海會開華嚴冥陽九聖俱相兼神九入口出生死

不管日月奔烏蟾何由更覓安心法道場豈足誇苔雪
試看塔影納隙中定有天神驅六甲分明七級影離離
壁間高下肩相差法王神化有如此聖皇垂拱原無為
佛乘端信翊王度深擁五雲凝彩霧普令福慶及華夷
國裕民康不加賦天章錦燦筆法妍花雨繽紛飄九天
小臣拜舞效三祝我皇壽與天齊年

追賦虞公務白鶴山房圖

無錫虞公務與余為從
表兄弟元季徙居蘇州

之陽山山有丁令威祠因名白鶴峯扁其居室
為白鶴山房蜀人王息菴先生為畫山房圖并

題詩其左距今三十餘年矣先生化去已久公務亦歿于戍所觀圖誦詩不勝悲愴因賦一詩以寓懷人之情云

遼東仙人丁令威千年化鶴曾來歸何年度海到吳下
巢松直向陽山飛遂呼山名號白鶴荒祠古木橫煙霏
至今仙人鍊丹井赤霞熒熒騰光輝陽山山人性高潔
架岩鑿壁開門扉閉門讀書不出戶超然不受功名鞿
松間行拖綠玉杖石上坐理黃金徽研硃點易滴清露
採藥披雲穿翠微客來隨分設有核牀頭酒熟黃雞肥

時招白鶴下庭際按舞翩翩翻羽衣青城仙翁隔隣住
往來慣熟俱忘機為題詩篇寫畫圖染毫粉墨縱橫揮
騷人墨客競題詠展圖滿軸皆珠璣邇來轉眼三十載
青山不改人民非仙翁騎鶴去不返山人遠戍亦永違
孤山無人赤壁靜蕙帳冷落誰相依空餘山房舊時月
夜深寂寞穿簾幃嗟余撫卷三太息感今念昔重歎欬

寄楊浩秦或二生

楊秦兩生我愛友憶昔燈牕共相守詩書過眼不再讀

下筆翩翩不停手我常賞歎心暗期一舉高科復何有
我從登朝濫班列一別睽違十年久思之日夕不少置
南望龍山幾翹首聖皇繼統開太平霈澤深仁及枯朽
普天率土盡維新誕布恩光滌瑕垢首開科場選賢俊
拔擢嘉禾耨稂莠維時三年紀永樂孟秋七月歲乙酉
子來從試入京闈一見相親情愈厚時過客舍得留連
旋買新醪剪畦韭楊生高中李三前秦生暫落孫山後
邇來別去又三年每念何時復相偶好及青年加向學

須惜光陰駒過牖焚膏繼晷莫辭勞計日課功無自苟
棘闈重開在八月炯炯奎光貫牛斗明年二月當大比
陶冶良金琢瓊玖佇看一戰霸羣英囊底韞才須抖擻
老夫數日遲子來使我離懷得傾剖都門三月春正妍
萬縷黃金動楊柳走筆題詩遠相寄遙勸停雲一杯酒
子如千里同我心頻寫音書報安否

送周紀善姪某還吉安

廬陵周生美而頎東書觀光遊帝畿
摳衣問學拜先輩

况有伯父為歸依，祇今青年未弱冠。文采風流如陸機，
萬言過眼不再讀。咳唾落地皆珠璣，神駒不與凡馬齒。
鵝雛豈逐羣鳥栖，邇來學力博充益。雙瞳炯炯身魁肥，
秋風吹霜百草死。慨然夢寐思親闈，伯翁苦留不肯住。
買舟一夕趨南歸，贈行詩文滿巨軸。爛然雲錦爭光輝，
櫂歌時驚沙鳥發。帆影遠拂孤雲飛，長江東流日西沒。
鴈聲叫落蘆花磯，舟行到家十日後。喜氣充閭翻綵衣，
廬陵自昔號多士。故家文獻猶依稀，子方向學負奇氣。

才俊自是當今稀
明年秋試定高中
一戰奏捷荆棘闡
男兒有志在弧矢
名位豈肯安卑微
却笑當年杜陵老
臨歧何必空歎欬

牧牛圖

東臯二月春草生
江邊放牛花雨晴
牧兒唱歌牛齧草
穩坐牛背隨牛行
牛角攢攢耳濕濕
斷隴荒陂隨意入
煙蒲風柳不勝情
日暮歸來荷蓑笠
我本山林牧牛叟
濫著朝衫今白首
儼買江南黑牡丹
乞取閒身老農畝

無錫鄒惟凱定省卷

道鄉諸孫純孝子謫戍滇陽將一紀白頭老母留高堂
日夜思親淚如水武侯祠外鷓鴣啼金馬山頭白雲起
長時飛夢見持環幾度悲歌勞陟屺前年有子代執役
得告東歸抵鄉里僕夫迎門烏鵲噪兒女牽衣犬搖尾
濯足升堂拜阿嬭淚盡慈顏方一喜試看著破身上衣
一一親縫出針指按行丘隴酌松楸墾闢原田課耘耔
一川時雨長桑麻十里春陽耀桃李朝耕夜讀了租賦

夏清冬溫供滄漣藹然和氣溢門闌此樂人生更無比
我與鄒君同里閉齒豁頭童嗟老矣戀闕貪官歸未得
仰羨高風重歎美乃知孝感通神明端信人倫即天理
展圖捉筆賦長歌留待詞林播青史

東坡畫萬竹圖為越人龔處士賦

蜀山修竹多於蓬千岩萬壑皆青葱氣凌彭澤拚吳會
色破銀河橫月宮冷雲晴雪暗陸海蠻煙怪雨飛寒空
鸞尾梢梢蛟骨瘦翠影拂落南飛鴻不隨桃李媚韶景

獨伴松栢凌嚴冬託根苦遭樵叟厄結交不厭詩人窮
七賢六逸去已遠知心祇有眉山翁山翁前身古仙伯
渭川千畝吞胷中盡將一段林壑趣寫作萬挺莓苔叢
玄霜漬玉土花濕鉛露滴香金粉融湖州名筆未足儗
薊丘遺墨那敢同宣和秘府收不住何年流落來江東
渤海諸孫特好事深閔瓊函加錦幪前時攜來出示我
展軸一見疑神功碧陰滿地如可掃耳邊肅肅驚秋風
憑軒寂聽無所見似有鳴鳳聲嗶嗶捲圖還客慎愛惜

恐逐風雨成虬龍

題華康伯綠筠窩卷

華生好竹真成癖繞屋簷簷賸栽植萬竿翠羽結秋陰
千挺琅玕接寒碧綠雲旆旆拂疎簾蒼雪紛紛點瑤席
旌幢搖月影翻翻環珮響風聲浙浙竹下幽軒小於斗
於此藏修事遊息簷楹面面拂清涼牕戶團團挹虛白
每從燕集會嘉賓未許題門來俗客炊煙燒笋欲呼酒
滴露研朱時點易遊魚弄水出聽琴白鶴上堦來看奕

頗類堯夫安樂窩遠勝揚雄一區宅命名正欲擬坡老
食肉匪期追阮籍中有一翁如玉立白髮婆婆岸輕幘
天光妍和風日美拄杖鏗鏗築苔石玉肌淺刻寫新題
鳳管旋裁成短笛華生早孤惟養祖甘旨承顏奉晨夕
始知孝子出故家詩禮相傳有餘澤遂令當時好事者
畫圖詩卷俱充斥嗟余孤身本華甥幼養舅家隨戲適
于時伯舅獨見賞撫我誇談加愛惜自慚宅相本非才
潦倒無成困窮厄乃祖於予實中表不比尋常衆親戚

華生於余雖至親素昧平生未相識浦翁持圖忽示我
展卷重尋舊遊跡此君依舊長孫枝感念渭陽思往昔
他時定訪辟疆園乘興敲門躡雙履

題待渡圖

小船橫繫溪邊柳隔岸行人問溪口號呼喚渡船不來
日落彷徨空立久秋清霜葉紅如春蒼煙漠漠波粼粼
安得有船長渡人勿使病涉嗟艱辛

初暘軒詩

君不聞蓬萊東連弱水西六鼇戴出青雲梯手捫天關
折若木海色初動聞金雞又不聞崑崙山頭十二城黃
金為宮白玉京日華照耀不見底鸞翔鳳翥相和鳴我
思欲往安可得萬里青冥無羽翮流光一去不復迴坐
看羲和鞭白日君家城隅一畝宮五更日浴咸池東火
輪飛來海潮湧八窓洞射光曛曛梧桐開花竹吐實草
木盡入熙熙中大明御極臨中土曜靈當天萬物覩六
合同光四海清金烏飛鳴朱鳥舞先生抱才世莫窺覽

德際此文明期歲蕤九苞出應瑞氈毳五色紛來儀請
君寅賓向初出呼吸丹霞漱靈液上乘六氣登春臺又
何必升崑崙上蓬萊

青山白雲圖

連山盤盤隔溪水翠滴嵐光淨如洗松梢日出初雨晴
滿地白雲收不起溪窮路轉石徑斜隔溪遙見山人家
柴門深閉人不見煖風吹落朱藤花良工邈得無窮景
坐翫令人發深省何由築室住山間長卧雲窩弄秋影

為僧題趙松雪畫馬圖

吳興學士多清暇不獨工書復工畫
染毫寫得五花驄
筆法何能讓曹霸冰團雪點青
連錢圉人牽過閑門前
雄姿逸態活欲動後來流落知何年
阿師前身本支遁
平生愛馬誇神駿千金購得日相看
牝牡驪黃何足論
我聞畫妙能通神虹光夜貫房星文
師當保護加什襲
只恐化龍飛去騰天津

題王文石畫竹

洗硯池邊數竿竹墨痕吹染如玄玉蒼苔雨漬龍骨堅
睡鶴風翻鸞尾禿九龍山人王子猷作畫遠過文湖州
平生愛竹不暫舍染毫寫作湘江秋妙得當年撥鐙法
風枝露葉渾如活掛之素壁高堂中颯颯涼風動毛髮
老夫奈有滄洲情對此頓覺心神清擬與墨君相結約
歲寒不改金蘭盟

為周正倫題張真人雲林書舍畫

青山如龍石如羊鐵崖半壁開金堂上清仙翁讀書處

東風草木皆天香五銖衣薄冰綃澁天花散落青霞笈
日長誦徹藍珠經銀鸞煙冷龍霜濕去年謁帝朝清都
染毫寫得山居圖松濤響透毛骨闕 若遊蓬壺

草堂夫子登瀛客十年賣藥長安陌一瓢藏却九華峰
始信仙凡原不隔我慕尋真嗟已老何由覓得安期棗
願從夫子逐仙翁同訪丹丘拾瑤草

青山白雲圖

白雲茫茫山靡靡咫尺雲山若千里青城山下有幽人

結屋青山白雲裏山人高臥不出山讀書長掩青蘿關
坐看青山不知老心似白雲相對閒良工逸得雲山景
螺髻翠滴龍綃冷此時獨酌甕頭春爛醉雲窩呼不醒
老夫本是山林人畫中一見情逾親白頭戀闕未歸去
他年空卜雲山隣

禱雨有感贈郭鍊師

今年六月旱不雨萬室嗷嗷困炎暑稻秧渴水作枯苗
隴畝生塵圻焦土車聲徹夜氣力殫眼血呼天泣田父

寒飢未免啼妻孥租稅何由給倉庾縣中官長為民憂
寢食遑遑不寧處澄心齋沐致誠懇遍走山川禱靈宇
熾熾旱氣勢轉甚邈邈蒼穹竟無語華陽真人歷四朝
曾是清都學仙侶城隅大隱四十年名在丹臺紀玄圃
我侯投詞拜壇下乞致甘霖救禾黍真人惻愴憫黎元
首肯口辭心默許檄龍勅水建清筵駕鶴乘風下仙嶼
手操火印擊天蓬足踏天罡步神禹綠章封事奏神霄
鐵簡畫符開水府驅役雲師起風伯麾叱雷公呵電母

青龍騰驤白虎嘯紫鵝飛鳴赤雞舞黑雲一片起西北
頃刻漫天滿區宇倒傾天瓢注玄液有似翻盆沃焦釜
盈時觀者近萬人嘖嘖稱呼咸仰覩滂沱一雨接三日
田野公私悉霑溥盡令黃枯變蒼翠一夕芄芄被原隴
畦長秋蔬得甘毳井溢寒泉洗酸苦豈知滴滴是精誠
始信涓涓勝膏乳蘇翁作記良可喜東晉通神那足數
飽食私賀及吾曹豐歲已看還聖主壺漿簞食豈足謝
何異豚蹄祀田祖稗官願採野人謠歸載太常編樂譜

次謝疊山菖蒲歌韻

玲瓏山骨鬼鑿成，嶙峋勢欲剝空青。乃知妙育孕奇秀，
上有神草通仙靈。爾從何處得此物，歲寒共結心交盟。
孤高不媚俗士眼，蔥蒨獨得幽人情。滿堂爽氣清入骨，
肅肅似有涼飈生。一泓秋水浸寒玉，彷彿三島浮東瀛。
夜深月明不敢近，恐有仙人來上行。巒岿一拳虎豹脊，
鬱律九節蛟龍形。試將并刀一剪拂，盲風怪雨飛青冥。
九疑山人在何許，遠隔蒼梧凌洞庭。蟠桃無根露盤朽，


茂陵但有猿哀鳴那知長生別有藥却笑記得嵩呼聲
但令入口變仙骨何用富貴誇冠纓誰云吞花得貴子
此言誕妄殊不經石芝未必解不死甘菊豈足延遐齡
細吸清香咽玉屑御風直上崑崙城清風一片從地起
白日虛舉人皆驚梅仙大隱在城市藥不貳價能廉平
更邀盧敖約汗漫歷訪名山游太清至今溪邊洗藥處
春香十里流芳馨爾家累世積陰德一生誼重黃金輕
定知功行滿八百紫府丹臺留姓名

題江南春雨圖

羣山鶻突雲模糊長蘿遠水連平蕪孤村絕浦望不極
幾家茅屋懸漁叢輕舟數點小於葉出沒煙浪同飛鳧
江空雨勢來不已水風颭颭吹菰蒲前山禪宮白雲際
明滅時見金浮屠貌將一段丘壑趣寫作萬里煙霞圖
憑軒寂聽無所見彷彿似有清猿呼我昔南遊會稽上
雲門六寺尋僧徒手支枯筇躡短屐窮幽陟險隨樵夫
曉雲漫山失老鶴暮雲擁樹間飢烏石崖松瀑濺飛雪

水聲活活風胡胡若耶溪深不可渡沿流細路行縈紆
歸來濯足憩小軒曾中塵氣一點無自從江海困奔走
衝寒觸暑趨長途追思勝賞不可到十年南望空嗟吁
朝朝覽鏡獨惆悵兩鬢雪白容顏枯東陽山人特好古
寶此名筆如瓊珠吳箋一幅不滿尺懷山捲海置座隅
鋪闕展軸看未了何異短褐藏天吳王郎妙手信莫及
功與小米論鉛銖想當運意揮染際倒寫水墨翻金壺
祇今此景在何處欲往不得歲已徂還君此畫重太息

塔馬長吟據槁梧



三華集卷十八